

Date – 04/09/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Mizoram sorkarin tuialhthei man atanga VAT chhiah lak a tihpun hnuah vawiin atangin petrol leh diesel rate thar hman tan a ni.
2. MNF Party chuan Mizoram State Commission for Women Chairperson chu dan loa ruat a nih thu sawiin, bang turin an phut.
3. Vawiin khan sawrkar laipui, Tripura sawrkar leh Tripura-a hel pawl NLFT leh ATTF ten New Delhi-ah inremna an ziak.
4. Prime Minister Narendra Modia chuan vawiin khan Brunei lal Sultan Haji Hassanah Bolkiah a kawm.

<><><>

### CM – USA MIZO DAY

Chief Minister Pu Lalduhoma'n ZPM sorkar chuan Mizo hnam tobul chhuitu tur din a tum mek a ti.

Rockville, Maryland, USA-a Mizo Day-a hmanpuinaah Pu Lalduhoma chuan he thu hi sawiin khawvel puma Zofate'n inunauna leh inpumkhatna nghet zawk an neih theihna tur thinlung pu chungin Mizo Day chu hman turin kalkhawmte a sawm a ni.

Chief Minister chuan Mizo inti zingah mahni hnam hminga Mizo tih hming hman pakhat mah an awm lo tih sawiin, an zavai huap hnam hming a nih tawp thu sawiin, Lushai, Kuki, Chin tihthe chu pianpui hnam hming ni loin, hnam dangin an kohna mai a ni a ti a, zohnahthlak hnam hrang hrangin an pawm tlan theih hnam hming huapzo a lo la pian a beisei tlat a ni, a ti bawk.

<><><>

### TAXATION MINISTER - GST

Taxation Minister Dr Vanlalhlana'n Mizoramah GST pe lo leh pe dik lo an tam tih sawiin Kristian taka tha taka chhiah pe thin turin Mizo mipuite a ngen tih a sawi.

He thu hi nimina tuialhthei man sang chungchanga thuthar lakhawmtute a kawmna ah sawiin Minister chuan mipuite tanrual puiah sawmin GST lak chungchangah thil diklo ti an awm chuan department ah hriattir zel turin a ngen a ti a, Midang enkawl departmental work atangin chhiah, goods & services tax (GST) lak tan anih thu a sawi a, kum 2019-a Mizoram sawrkarin composition scheme a siam angin GST hi lak ani dawn tih a sawi.

Dr Vanlalhlana chuan sawrkarin GST leh professional tax ah huang a zauh mek thu sawiin Estimate a awm tawh reng si, chhiah pek loh ang chi kha sawrkara lak luh dan an ngaihtuah a ti a, departmental work hnuai mi dangin hna an enkawl sak atangin GST lak ani tawh dawn a, GST chu cheng nuai 10-50 inkarah zaa 6 lak ani dawn a, cheng nuai 50 chung lamah zaa 18 lak ani dawn tih sawiin department in an thawk anih chuan GST lak ani dawnlo a ti.

Thla liam ta August ni 21-a Mizoram Legislative Assembly thutkhawmah The Mizoram Goods and Services Tax (Amendment) Bill , 2024 hi passed a ni a, Minister hian hemi chungchang a sawina ah Input Service Distributor siamthat a ni tih sawiin thil siamchhuaktuten an thil siamchhuahna khawl an register loh emawa hremna awm thei tarlan a ni a ti a, Input Tax Credit a awm thar dawn tih sawiin hei hian state danga office nei ten hmun danga GST anlo pekin Mizoram lamah an an pek tlem theihna tur ngaihtuah sak anni dawn tih a sawi.

<><><>

## CYMA

Central YMA hruaitute leh NHIDCL hotuten vawiin khan Mizoram chhunga NHIDCL hnuai kawngpui laih mek leh harsatna te an sawiho a,

Inkawmna ah hian Mizoram hmun hrang hranga inkalpawhna kawng NHIDCL enkawl siamthat chungchang te leh hmun hrang hranga kawngpui laih mek te sawiin NHIDCL Executive Director Virender Jakhar chuan Spoil- Bank ni lo a leivung paih awm te chu enfiah a hmalak zui a tum thu sawiin Lunglei leh Tlabung inkar kawngpui chu Kumin December ah chuan zawh deuh vek a nih tawh tur thu a sawi a. Saitual - Saichal inkar kawng leh hmun dangah pawh theihtawp an chhuah tih a sawi bawk.

Central YMA hruaitute chuan Mizoram in kawngpui tha a neihna tura hnathawh kal mek chu tluang taka a kal zel theih nan Contractor puih an inhuam thu an sawi a, dan ang thlapa hnathawh a nih theihna tur leh tlo ngei tura hnathawk a, leivung chu a paihna tur ngeiah paih a nih zel theihnan NHIDCL hotuten Contractor te hnathawh enpui zel turin an chah a ni.

<><><>

## DECEASED BODY TRANSPORTATION

Social Welfare Minister Pi Lalrinpuii'n Mizoram puma ruang phurh chu tun thla ni 1 atang khan sawrkarin mawh ah a la tawh a ti.

He thu hi vawiina thuthar thehdarhtute a pisaa a kawmna ah sawiin Minister chuan ruang phurh nan budget ah cheng nuai 500 dah a ni a ti a, ruang phurhna atan sawrkar hnuai motor inziak lut zinga empanel te chu hman theih an ni dawn tih sawiin ruang phurh man chu sawrkarah dil let theih ani dawn a ni a ti.

Minister chuan ruang phurh tanna leh a dahna inkar chu km 20 tal ani tur ani a ti a, ruang phurhna atan lirthei pakhat chauh hman tur ani tih sawiin Department in a kenkawh dan an siam sa vek a ti a, ruang phurhna man hi department ah emaw district chhunga District Social Welfare hnenah thehluh theih ani dawn a, an motor hman man chu sawrkar in rate a siam angin a rul let dawn a ni a ti.

Minister chuan damdawiina thi anih loh chuan dilna form-a inziak angin thuneitu hriatpuina thil tel tur ani dawn tih a sawi bawk a, a dan chuan motor hman man ngawr ngawr chauh a huam dawn tih a sawi.

Pi Lalrinpuii sawi danin ruang phurh man sawrkar in mawh a a lakna chhan chu MLA te phurrit lutuk chhawkna tur leh mi tam zawk huapzo tura hmalakna a ni

a ti a, voter ID emaw Aadhaar card nei te tan dil theih ani tih sawiin a hranpa in raltlan an huap tel lo tih a sawi bawk.

<><><>

## PROTEST ON OIL PRICE HIKE

Congress Party thalaite'n Petrol leh Desiel man tih to leh chhiah dang sorkar-in a tihsan duhlohna vawiin khann an lantir a, PC Party pawhin tuialhthei man sang hi tha antih loh thu an sawi.

Aizawla Mizofed Petrol Pump, Vanapa Hall bulah chhiah tihsan duh lohna lantira an neih hnua thuhchhuah an siamah Mizoram Pradesh Youth Congress Committee chuan chhiah tisang lo tura intiamte'n hetianganga sanga chhiah an pun hi mipui hmuhsitna leh bumna liau liau a ni an ti a, hmarchhak state zingah Mizoram chu oil man sanna ber state a nih thu an tarlang bawk a ni.

MPCC Treasurer Dr Lalmawlsawma Nghaka chuan, Mi harsa zawkte tan zalenna, Danglamna, 'kalphung thar' tiamtute'n Mizoram mipuite chhiah uchuak tak hmangin salbeh an tum mek a ni, a ti a, property registration Fee an ti sang tawh a, tunah Petrol leh Diesel chhiah an ti sang leh bawk tih sawiin, Mizoram mipuite an rûm mek laiin, chief minister chu tuipuiralah mipuite auh phak lohin a awm ta daih mai chu a mak hle a ni, a ti bawk.

Hetihlai hian PC Party chuan tuialhthei man sang chu Mipuite phurrit chhawk zangkhaina lam ni lo in Mipuite sum bawm rawk zawnga Mizoram sawrkar hmalakna ani an ti a, a rang thei ang bera sût a nih theih nana hma la turin Taxation deptt.hotute hnenah an ngen tih an sawi bawk.

<><><>

## MSCW CHAIRPERSON

Women & Child Development Minister Pi Lalrinpuii'n Mizoram State Commission for Women Chairperson Pi Lalchhandamin Birth Certificate sawrkara a thehluk ah a kumzat in dan a pel lo a ti.

He thu hi vawiina thuthar lakhawmtute a kawmna ah sawiin Pi Lalrinpuii chuan MSCW Chairperson Pi Lalchhandami chu kum 1960-a piang ani a ti a, a certificate thehluk chu pawmsak anih avangin tuna a hna chelh chu a thawk thei niin an ngai a ti a, mi tam tak chu Birth Certificate diktak leh sawrkar kum inmil lo fo an awm thin avangin zirchian mek ani a ti bawk.

Pi Lalrinpuii sawi danin Pi Lalchhandami chu mi rintlak tak niin an duhsak bik vang nilo in Chairperson tur an zawna ah Pi Lalchhandami chu tha bera an hriat avanga ruat anni tih a sawi bawk.

Hetihlai hian MNF Legal Board chuan nimin khan thuthar thehdarhtute an kawmna ah MSCW Act 2004 hnuaia Dan siamah Chairperson atan kum 65 pel tawh chu ruat theih a nih loh thu chiang taka a inziah thu sawiin; Sorkar document hrang hrang leh Kohhran record-ah Pi Lalchhandami chuan Chairperson atana ruat a nih hian kum 68-na a hmang mek tawh tih chiang takin a lang a ni an ti a,

MSU pawhin April ni 8 khan MSCW Chairperson sawrkarin a ruat chu RTI kaltlanga chhanna an neih atanga lan danin March ni 31, 2016 ah a pension tawh an ti ve bawk a ni.

<><><>

## NEDFI

School Education Department leh North-eastern Education Development Finance Corporation Ltd. (NEDFi) te chuan thawhdunna thuthlung an ziaak a, zirlaite

kalzelna tur kawhhmuhna tur, he thawhdunna thuthlung 'Advancing North East Initiative for Career Mentoring of Students' hnuai ziah a ni.

Thawhdunna thuthlung hi Directorate of School Education Conference Hall, Aizawlah ziah a ni a, School Education Minister, Dr. Vanlalthlanan a hmanpui.

Minister chuan, Department leh NEDFi-te thawhdunna chu Mizoram zirna atana rahbi pawimawh tak a nih thu sawiin, thawhhona chuan Mizorama zirlaite tan hma hun eng zawk a thlen bakah, thalaite tan beiseina thar a thlen ngei a rin thu a tarlang a. Hei bakah hian thawhdunna a lo hlawhtlin leh zual theih nan official-te chu theihtawp chhuah zui turin a ngen nghal a ni.

He Thawhdunna Thuthlung hnuai hian, Mizoram a zirlai, Higher Secondary School chinte chuan, an zir zel dan tur chungchanga kaihhraina an dawng thei dawn a. Advancing North-east Portal kal tlangin hriattur pawimawhte chu en theih a ni ang a. School tin atangin zirtirtu ruat bikte kal tlangin zirlaite kaihhraina chu kalpui tum a ni.

<><><>

TRIPURA

Vawiin khan sawrkar laipui, Tripura sawrkar leh Tripura-a hel pawl National Liberation Front of Tripura, NLFT leh All Tripura Tiger Force ATTF ten New Delhi-ah inremna an ziah. He hunah hian Union Home Minister Amit Shah, Tripura Chief Minister Manik Saha leh Union Home Ministry leh Tripura sawrkara mi pawimawh tak takte an tel a ni.

Thusawiin Union Home Minister chuan NLFT leh ATTF ten an silai tung a nunphung pangngai zawm tur leh Tripura hmasawna tura an rawn penchhuak chu lawmawm atih thu a sawi a. Prime Minister Narendra Modia sawrkarin hmarchhak hmasawna turin remna leh inbiakna hmanrua hmangin a hmahlir tha tak a rawn lan tir a ni a ti a. Narendra Modia sawrkar hnuai hmanrua hmarchhaka remna leh muanna a awm theih nan hian inremna chi 12 lai ziah ani tawh tih a tarlang bawk a ni.

<><><>

PM

Prime Minister Narendra Modia chuan vawiin khan Brunei lal Sultan Haji Hassanal Bolkiah a kawm a. Pu Modia chuan Sultan Haji Hassanal Bolkiah a kawm thei chu lawmawm a tih thu social media-ah a tarlang a. Ram pahnihten an inzawmna tih nghet turin zau tak leh huapzo takin an inbia tih a sawi a. India leh Brunei ten sumdawna an tilian zel dawn tih sawiin mipuite inpawhna tura hmalakna pawh an ti chak zel dawn a ti a. India-Brunei inkar inzawmnaah phurna thar a awm thu sawiin Act East Policy chungchang pawh an sawi dun tih sawiin an inbiakna chuan rah tha tak a chhuah a ti a. Ram pahnih thawhdunna pawh Enhanced Partnership ah hlankai a ni a ti.

Prime Minister Narendra Modia hian nimin khan Brunei a thleng a. Bandar Seri Begawan-ah ropui taka lo lawm a ni a. Brunei-ah hian Crown Prince Haji Al-Muhtadee Billah chuan Brunei International Airport ah a lo hmuak a. Tun tum hi India Prime Minister-in Brunei a tlawh hmasak ber a ni.

Prime Minister Narendra Modia hian vawiin chawhnhnu khan Singapore a thleng a. Singapore Minister of Home Affairs and Law K Shanmugam chuan a lo hmuak a. A thlenna hotel ah Singapore-a India mi chengten an lo hmu bawk a. Singapore Prime Minister in zaninah zanriah a buatsaih sak ang a. Naktuk hian Singapore Prime Minister leh President bakah mi pawimawh tak takte a kawm dawn a ni.

<><><>